

04 JUN 1998

MAHATHIR-PERSIDANGAN/I

MAHATHIR BERI AMARAN KEMUNGKINAN KEGANASAN TERHADAP PENGUASAAN ASING

Oleh: Michael Raj

TOKYO, 4 Jun (Bernama) -- Datuk Seri Dr Mahathir Mohamad memberi amaran kepada para pemodal asing terhadap pengambilalihan ekonomi Asia secara paksa kerana rakyat mungkin bertindak balas, kemungkinan menerusi keganasan, berikutan kehilangan syarikat negara mereka.

Jika aliran seperti ini tidak dibanteras, Perdana Menteri berkata rakyat akan menunjukkan kemarahan mereka terhadap orang luar yang akan menguasai mereka sekali lagi.

"Lambat laun mereka akan memikirkan untuk mendapatkan semula kuasa ekonomi mereka dan mereka akan menganggap perkara ini sebagai satu perang pembebasan baru."

"Walaupun mereka cuba untuk mengelak keganasan, keganasan ia pasti akan berlaku kerana para pemodal baru itu mengabaikan petanda-petanda," katanya dalam ucap-tama mengenai "Masa Depan Asia dalam Dunia Globalisasi dan Deregulasi" pada satu persidangan antarabangsa yang dianjurkan oleh Nihon Keizai Shimbun, Inc. di sini, hari ini.

"Memanglah tidak akan berlaku peperangan menuntut kemerdekaan, tetapi akan tercetus semacam perang gerila yang pastinya menyusahkan semua orang," katanya kepada lebih 200 ketua korporat, eksekutif perniagaan, pakar ekonomi dan ahli akademik kebanyakannya dari Jepun dan rantau ini yang menghadiri persidangan itu.

Dr Mahathir juga memberi amaran kepada Asia untuk berhati-hati terhadap penganjuran deregulasi dan globalisasi kerana dorongan berterusan ke arah matlamat itu akan lebih melahirkan keinginan mementingkan diri sendiri untuk menguasai lebih daripada memberi bantuan.

"Dasar kapitalis yang hodoh seolah-oleh berada di sebalik perhatian dasar kemanusiaan ini. Ia tidak berperih kemanusiaan sama sekali dan akibat daripada permintaan ini akan menyebabkan penduduk di negara-negara terbabit semakin miskin dan bukan semakin kaya," katanya.

Penguasaan asing dalam ekonomi-ekonomi yang terjejas oleh krisis mata wang tidak dapat dielak akan membawa kepada masa depan di mana ekonomi Asia akan dikuasai oleh syarikat asing besar yang dimiliki serta diuruskan oleh penduduk bukan Asia.

Dr Mahathir berkata kapitalis, yang suatu ketika dahulu membenci Komunis kerana membunuh kebebasan dan demokrasi, kini masing-masing mula melupakan prinsip yang dipegang oleh mereka bahawa konsep negeri negara dan kemerdekaannya mestilah dibongkar untuk memenuhi keperluan ketika ini.

Beliau berkata tekanan terhadap Asia untuk membuka kepada penguasaan asing sudah memuncak seperti yang dibuktikan dalam syarat-syarat bantuan yang dikenakan oleh Tabung Kewangan Antarabangsa (IMF), yang mendakwa hanya syarat-syarat itu yang boleh membantu mereka pulih semula.

Negara-negara terbabit dipaksa membatalkan sekatan pemilikan tempatan yang mengakibatkan pelabur asing mengaut aset bernilai trilion dolar daripada bank dan syarikat tempatan walaupun tiada petanda jelas pemulihan akan berlaku, katanya.

Dalam proses itu, Dr Mahathir berkata negara-negara yang terjerumus akibat krisis mata wang yang kini memasuki 11 bulan akan kehilangan identiti ekonomi negara mereka, yang akhirnya akan menghapuskan identiti ekonomi Asia.

Kerajaan yang lemah akibat daripada krisis itu terpaksa menyerah kerana "mereka tahu mereka berdepan dengan kuasa-kuasa yang tidak mampu ditewaskan."

Beliau merasakan dalam dunia tanpa kawal selia globalisasi, masa depan Asia yang berkait dan berhubung dengan rapat dengan seluruh dunia sehingga tidak dapat dibezakannya.

Beliau berkata negara-negara Asia mungkin akan makmur semula tetapi bukan sebagai negara Asia.

Asia Tenggara akan menyediakan pangkalan bagi pengeluaran produk kos rendah untuk bersaing dengan ekonomi besar Asia tertentu yang enggan dikuasai dan "akhirnya, negara-negara besar ini juga akan menyerah kalah," katanya.

Dr Mahathir berkata hanya jika negara kapitalis itu sendiri menahan mereka, barulah masa depan dunia, di mana Asia adalah sebahagian daripadanya akan aman dan makmur.

Beliau juga berkata janji-janji mengenai keuntungna yang tidak terhad daripada eksploitasi negera-negara miskin -- yang kini menderita daripada segi ekonomi, sosial dan politik -- menyebabkan kapitalis baru mendesak terhadap deregulasi dan globalisasi tanpa mengira apa carapun.

Bagi negara-negara miskin, beliau berkata "jika kerana sikap boros mereka menyebabkan mereka tidak mampu membayar hutang asing, selepas penyusutan nilai mata wang mereka lebih lagi tidak mampu membayar hutang mereka."

Beliau menambah, "Ini akan menyedarkan mereka kepada kekurangan kemahiran dalam menguruskan syarikat mereka dan mereka akan bersedia menerima modal, perkhidmatan dan penguasaan oleh syarikat asing."

Dr Mahathir juga menasihatkan Asia supaya tidak tertipu oleh dakwaan kononnya tanpa deregulasi dan globalisasi, rakyatnya akan terus dibebani dengan ketidakcekapan dan ahli perniagaan tempatan yang kekurangan modal, yang akan menyediakan barangan dan perkhidmatan bermutu rendah pada harga tidak munasabah.

Menerusi deregulasi mutlak, seluruh dunia akan menjadi sebuah negara, terbuka kepada semua orang yang tahu dan boleh mengeksploitasi potensi perniagaan kepada peringkat yang maksimum, katanya.

Hasil dunia tanpa kawal selia diglobalkan ialah kemunculan syarikat besar dan bank dengan cawangan di setiap negara di dunia dan jumlahnya tidak terlalu besar kerana syarikat dan bank kecil akan dimiliki atau ditelah dengan apa cara sekalipun.

"Terdapat kemungkinan syarikat gergasi yang beroperasi di negara-negara yang dipaksa membuka ekonominya akan mempunyai pengaruh yang serupa ke atas kerajaan," kata Perdana Menteri.

Sehubungan dengan itu, beliau berkata malahan demokrasi terpaksa dikorbankan bagi memberi laluan kepada kuasa pasaran dalam menentukan dasar dan kepimpinan kerajaan.

--BERNAMA

MR ZK OS